

Waraga na Paulo öcöö both Jö Epeco

Köp na tye i buk ka jö Epeco

Më acël, waraga ka Paulo both jö Epeco makö köp më “Yüb k'Obanga na ën bino cobo ka karë örömö, ënë më cökö jami kibëc na tye i polo ëka i wi lobo, më ribögï ökö kanya acël i Kiricito” (Epeco 1:10). Obedo thon köp both jö k'Obanga kür öwëk gïni yüb na pïrë tøk ni pï ribërë ka jö kibëc i bedo acël i Kiricito Yecu.

İ cök më acël na tye i waraga ka Paulo both jö Epeco, ngat n'öcöö oketho wi köp më ribërë nakun twakö kite n'Obanga Apap öyërö ki jögë, kite n'ëtïmö nigï kïca ëka ëgönyögï ki i kom balgi nakun wok ki both Wode Yecu Kiricito, ëka kite na cikërë na dit k'Obanga na Tipo Naleng omoko.

İ köp më ariö Paulo okobo both jö na kwanö më kwö i yoo na miö bedogï acël i Kiricito twërö bedo adyer i kwögï kanya acël.

İ carolok mërë na pol nyutho bedo acël ka jö k'Obanga i ribërë ki Kiricito: jö n'oye Kiricito cal ki kom, ki Kiricito na calö awie; onyo calö gedo, ki Kiricito na calö kidi më gwïc; onyo calö dhakö, ki Kiricito na calö cwörë. Jami kibëc nen i tar më mar ka Kiricito, tyër, timö kïca, ëka bedo na leng.

Moth n'öya ki both Paulo

¹ Waraga ni öya ki both Paulo n'obedo akwëna ka Kiricito Yecu pï miti k'Obanga.

Both jö k'Obanga na tye i Epeco, na gîn enë jö na genere i kwögi kanya acël kî Kiricito Yecu:

² An alëgö Obanga Apap onu ëka Rwoth Yecu Kiricito ömïïwu ibed unu kî kîca ëka kuc.

Gum më tipo na tye i Kiricito

³ Eru ëmïï pak both Obanga ëka Apap ka Rwoth onu Yecu Kiricito, n'ömiö onu gum kibëc më tipo na tye i polo i Kiricito.

⁴ En öyëro onu cön i Kiricito na pod bara öcakö cweo lobo, ëk onu ebed jö na leng i nyime abonge bal mörö i kom onu. Pî mar mërë,

⁵ Obanga kî miti mërë kënë onwongo dong öyübö cön nî onu myero ebed ëthînö mërë pî tic na Yecu Kiricito otio.

⁶ Eru ëmïï pak both Obanga pî kîca mërë më dheo na dit, na en ömiö onu nono i Kiricito na en marö.

⁷ Pî remo ka Kiricito Yecu, etyeko kökö onu ökö, ëtimö kîca i kom bal onu ökö, na lübërë kî lönyö më kîca k'Obanga na dit

⁸ na en ömiö onu na thwönë i ryëkö mërë kibëc ëka kî nîang.

⁹ Obanga ötimö man i karë na en otuco müng më miti mërë both onu, nakun lübö yüb mërë na bër na en onwongo öyübö më cobo i Kiricito.

¹⁰ Yüb k'Obanga na en bino cobo ka karë örömo, enë më cökö jami kibëc na tye i polo ëka i wi lobo, më rîbögi ökö kanya acël i Kiricito.

¹¹ Jami kibëc timërë na lübërë kî yüb k'Obanga ëka thama mërë. Obanga öyëro onu më bedo jögë i Kiricito nakun en onwongo dong öyübö anaka kî i acaki

¹² ěk wan, n'onwongo ěcakö bedo kĭ gen ĩ kom Kiricito, myero ěmĭi pak ěka dheo both Obanga.

¹³ Kiricito thon öyĕröwu mĕ bedo jö k'Obanga ĩ karĕ na un iwinyo köp adyer, Emuth na Bĕr n'okelo niwu larĕ. Un iye Kiricito, ěka ěnĕ ömĭö ěmĭöwu Tipo Naleng n'onwongo Obanga öcĭkö pĭrĕ cön ěk obed na calö anyuth mĕrĕ n'ěmwönö ĩ komwu,

¹⁴ na ěnĕ gin n'ejengo na nyutho nĭ onu ebino nwongo gin na kĭbĕc n'Obanga öyübĕrĕ mĕ mĭö onu ĩ karĕ n'Obanga bino kökö jögĕ—na bino mĭö jĭi pakö dheo mĕrĕ.

Lĕga ka Paulo

¹⁵ Pĭ tyĕn köp ni, anaka an awinyo köp ĩ kom yeewu ĩ Rwoth Yecu ěka pĭ mar na un ĩmarö kĭ jö k'Obanga kĭbĕc,

¹⁶ an ba awĕkö mĕ mĭö pwöc both Obanga pĭrwu, nakun apo pĭrwu ĩ lĕgana.

¹⁷ An alĕgö nĭ Obanga ka Rwoth onu Yecu Kiricito, Obanga mĕ dheo, myero ömĭiwu Tipo Naleng mĕ ryĕkö ěka onyuth niwu Obanga ěk inge unu ěn na bĕr rwök.

¹⁸ An thon alĕgö nĭ ömĕny thamawu ěk inge unu gen na ěn ocwodowu ĩĕ, kit lönyö ěka dheo na thwönĕ na ěn mĭö both jögĕ ěk obed mĕgĭ.

¹⁹ An thon alĕgö nĭ ĩniang unu kite na tĕkö mĕrĕ na dit tio ködĕ ĩ kom onu jö n'oye Yecu. Tĕkö ni na tio ĩ kom onu röm kĭ tic na dit mĕ twĕr na ěn tye ködĕ

²⁰ n'ocero Kiricito kĭ kin jö n'öthöö ěka ömĭö ěn obedo ĩ nget cĭngĕ mĕ kucem ĩ polo.

²¹ Ën dong tye malö i polo, löö ëlöc kibëc më polo, twërö, tükö, ëka nyïng kibëc n'ëcakö, pathi i lobo më karë ni këkën ëntö thon i lobo më karë na tye ka bino.

²² Obanga oketho jami kibëc i thë twër ka Kiricito ëk ölöö, ëka ömïö ën both jö n'oye Kiricito na calö wic nakun löö jami kibëc.

²³ Jö n'oye Kiricito obedo ginï kom Kiricito, na mïö jö n'oye pong na bër, nakun Kiricito thon pong i jami kibëc.

2

İ Kiricito jö n'öthöö dökö jö na kwö

¹ İ karë n'opoth un onwongo ibedo calö jö n'öthöö pï türö cïk ëka balwu.

² İ karë ca onwongo un ilübö yodhi na reco më lobo ni, nakun iwinyo unu köp ka ngat na rac na löö twër mökö na tye malö i yamö, na ënë cwiny na kobedini tye ka tic i cwiny jö na ba mitö winyo köp k'Obanga.

³ Onu kibëc onwongo ëröm ki jö nön i lübö miti më kwö më anywöli, nakun ecobo miti më kom onu ki gin na onu ëthamö. İ kite na yam onu etye ködë, akëmö k'Obanga onwongo myero opodh i kom onu calö jö nököne kibëc.

⁴ Ëntö Obanga obedo alönyö i kica mërë, mar na ën ömarö ki onu ködë dit rwök,

⁵ kadï bed ni onu ëdökö jö n'öthöö ökö pï türö cïk mërë, ën ömïö onu kwö kanya acël ki Kiricito—obedo pï kica k'Obanga ënë ömïö ilarë unu.

⁶ Obanga ocero onu kī ī thōō kī Kiricito, ēka ōmīō onu kabedo mē bedo kanya acēl kī Kiricito Yecu ī polo.

⁷ Obanga ōtīmō jami ni kībēc ēk enyuth ī karē kībēc na tye anyim lōnyō mērē na thwōnē na ba pimere mē kīca n'onen ī mar mērē both onu na Kiricito Yecu tīmō nī onu.

⁸ Piēn pī kīca mērē ōmīō Obanga ōlarōwu pī yeewu—ēka man ba ōtīmērē pī tic mōrō na un ītīmō, manōn obedo mīc k'Obanga—

⁹ pathī pī tic na dhanō tīmō, ēk kūr ōmīī ngat mōrō ōwakērē.

¹⁰ Onu ebedo gin n'Obanga otio, ēn ocweo onu ī Kiricito Yecu ēk ebed jō na tio tic na bēcō na ēn yam ōyūbō cōn nī ēk onu ētīm.

Bedo acēl ī Kiricito

¹¹ Pī manōn, po nī un cōn onwongo ibedo unu Erok ī kite n'ēnywōlōwu kōdē ēka Eyuda cwodowu nī “jō na ba ēlīrō,” nakun gīn cwodere kēn-gī nī “jō n'ēlīrō” (na cīng dhanō ēnē ōtīmō ī komgī)—

¹² po unu nī ī karē nōn un onwongo ipokere ōkō kī both Kiricito. Un onwongo ēkōōwu ōkō kī ī kom jō Icarael, ba īnywakō unu cīkērē k'Obanga ēka kī gin na kībēc na ēn ōcīkō nī ebino tīmō pī jōgē. Ibedo unu ī lobo ni abonge gen ēka na ba ingeo unu Obanga.

¹³ Ēntō kobedini ī Kiricito Yecu un n'onwongo itye unu na bor k'Obanga, ekelowu dong ōkō na cwōk pī remo ka Kiricito.

¹⁴ Ēn kikome okelo kuc ī kin jō arīō, ōmīōwa kodwu dong etye acēl, ēka ēn ōtūrō cēl mē gero n'opoko onu.

¹⁵ Pī kelo kuc, ěn ȳjwaō cīk ka Muca ȳkō kī cīk mērē kībēc. ěn ȳtīmō man ěk eketh jō ariō obed rok acēl na nyen n'ȳrībērē kanya acēl ě ěn.

¹⁶ Pī thōō mērē ě kor yath ariā, Kiricito odwongo jō ariō both Obanga ě kom acēl, ȳmīō adagē ojīk ȳkō.

¹⁷ Kiricito obino ȳtītō kȳp mē kuc bothwu un jō n'onwongo itye unu na bor kī both Obanga ěka both jō n'onwongo tye na cwōk.

¹⁸ Pī Kiricito onu kībēc etyeko yabō nī onu yoo mē thuno both Apap kī Tipo Naleng acēl.

¹⁹ Kobedini dong un ba ibedo erok onyo wele, ěntō un ibedo jō mē pacō acēl kī jō k'Obanga ěka ibedo unu jō mē ȳdē.

²⁰ Un dong ěcal kī gedo n'ěgērō, n'acaki thērē obedo ěkwēna ěka edwarpīny, kī Kiricito Yecu kikome na calō kidi mē gwīc.

²¹ Gedo nī kībēc okubere kanya acēl ě Kiricito ěka tye ka dōngō mē bedo ȳt k'Obanga na leng pī Rwoth.

²² Kiricito thon tye ka gērōwu kanya acēl ě kome, ěk ibed unu kanya Tipo k'Obanga bedo ěē.

3

Tic ka Paulo pī Erok

¹ Pī kȳp nī, an Paulo na an abedo amabuc ka Kiricito Yecu pīrwu, un Erok—

² Adyer iwinyo unu kite n'Obanga ȳmīa mē tio tic mē kīca mērē pīrwu,

³ dȳk thon kite na ěn onyutho nīna mūng mērē, na calō atyeko cȳōnō pīrē na cecek.

⁴ Ka ikwanö unu ngö na an acöö, cë un ibino nïang na bër kite na an anïang kî müng i kom Kiricito ködë.

⁵ I karë n'opoth anged, Obanga ba onyutho müng ni both dhanö, ëntö kobedini pî Tipo Naleng Obanga onyutho both ëkwëna mërë na leng ëka edwarpïny.

⁶ Müng ni ënë ni pî Emuth na Bër, Erok ödökö gini dong jö na leo lönyö k'Obanga kanya acël k'Eyuda, ödökö gini dul kom acël ködgi, ëka gin thon nywakö cikërë n'Obanga öcikërë ködë i Kiricito Yecu.

⁷ An adökö atic më Emuth na Bër ni pî mïc më kica k'Obanga n'ëmïa pî tic më tükö mërë.

⁸ Kadï bed ni an pïra ba tük rwök kî kin jö k'Obanga kibëc, kica ni onwongo ëmïa më titö Emuth na Bër both Erok pî lönyö na Kiricito mïö na ba ërömö pimo,

⁹ ëka më mïö jö kibëc ngeo yüb më müng k'Obanga, n'onwongo Obanga n'ocweo jami kibëc ökanö pî karë n'opoth anged.

¹⁰ Miti k'Obanga i köp ni kibëc onwongo mitö tic kî jö n'oye Kiricito më mïö ëlök ëka wegi twër kibëc na tye i polo ngeo ryökö k'Obanga na kothe papath.

¹¹ Obanga ötimö man na lübërë kî yüb mërë na ba thum na ën ömïö ocobere i Kiricito Yecu Rwoth onu.

¹² Pî Kiricito kobedini dong ën ömïö onu diö cwiny ëka tük cwiny piën onu dong ëtwërö bino both Obanga pî yee.

¹³ Pî manön an alëgö ni kür idwök unu cwinywu cen ni piën an atye ka limö can pïrwu, man kibëc obedo më mïöwu dheo.

Lëga pï jö Epeco

¹⁴ Pï tyën köp ni an arumo cönga i nyim Apap,

¹⁵ na ënë Acwec më jami kibëc na tye i polo ëka i lobo.

¹⁶ An alëgö both Obanga ëk ki i lönyö mërë më dheo ömiiwu twër ibed unu na tøk i cwinywu pï Tipo mërë,

¹⁷ ëk Kiricito obed i iwu piën iyee unu ën. An alëgö nï Obanga ömii icung unu na tøk i mar.

¹⁸ Ibed unu ki tøkö më nïang kanya acël ki jö k'Obanga kibëc, kite na mar ka Kiricito pï onu lac ködë, bor ködë, ödöngö ködë malö, ëka kite na thuth ködë.

¹⁹ An amütö nï inge unu mar ka Kiricito na löö ngec kibëc—ëka ipong unu i gin mörö kibëc n'opong i Obanga.

²⁰ Dheo kibëc obed both Obanga, na ënë twërö tio tic na thwönë rwök, na löö gin na onu ëtwërö kwaö pirë onyo ketho thama onu ië, pï tøkö mërë na tye ka tic i kom onu.

²¹ Dheo obed both Obanga naka naka i Kiricito Yecu ëka ki jö n'oye Kiricito më wang rok kibëc! Amën.

4

Nöthërë kanya acël i kom Kiricito

¹ Pï manön an na calö amabuc pï Rwoth, an akwaöwu nï ilüb unu kit kwö n'opore na rwatërë ki cwodo na yam ecwodowu ië.

² Bed unu ki wörö ëka ki mwolo i kom jö nököënë; ëka ibed unu jö na dangö gin na kibëc na balö cwiny dhanö, nakun ngat acëlacël diö cwinye i kom awodhe ki mar.

³ Tīm unu tēk mē gwōkō rībērē na Tipo Naleng
ōmīōwu ēk ibed unu i kuc na tweowu kanya acēl.

⁴ Kom tye acēl ēka Tipo k'Obanga tye acēl—kite
na gen thon tye acēl n'Obanga ocwodowu iē—

⁵ Rwoth tye acēl, yee tye acēl, batica tye acēl,

⁶ Obanga tye acēl ēka Apap ka jō kībēc. Ēn lōō
jami kībēc, tio i jami kībēc, ēka tye i jami kībēc.

⁷ Ēntō ngat acēlacēl i kin onu onwongo mīc mē
kīca, n'opore kī mīc na Kiricito ōmīō bothē.

⁸ Manōn ēnē ōmīō Cōc na Leng kobo nī:

“I karē na ēn ōidhō kōdē malō,
ēn otero opii na pol
ēka ōmīō mīc gīnī both jīi.”

⁹ (Tyēn kōp nī “ōidhō malō” gōnyō nīngō? Gōnyō nī
ēn thon obino pīny i lobo.

¹⁰ Ngat n'obino pīny ēn acēl nōn ēnē ōidhō malō
kanya bor i nge polo kībēc, ēk epong jami kībēc.)

¹¹ Mīc na Kiricito ōmīō gīn ene: ōmīō jō mōkō mē
bedo ēkwēna, mōkō mē bedo edwarpīny, mōkō mē
bedo jō na titō kōp k'Obanga, jō mōkō mē bedo
ēkwath ēka epwonye.

¹² Ticgī obedo mē yūbō jō k'Obanga i ticgī mē kōnyō
jīi ēka mē gērō jō n'oye Kiricito,

¹³ naka ka onu kībēc ēdōkō acēl i yee onu ēka i ngeo
Wod k'Obanga, naka ka onu ēdōkō jō n'otengo,
nwongo ēdōngō na rōm kī Kiricito, ēka onu ebino
bedo calō ēn.

¹⁴ Cē mīō onu ba dōkī ebedo calō ēthīnō, na pii na
tataga tatago yeegī, jō na wēkō yamō mē pwony na
papath lōkōgī, ryēkō ka jō ēka yūbgī mē twodo na
ba dōkī mīōgī cacapa.

15 Nakaka manön, onu myero ëtwak köp atir ki mar, onu myero ëdöng i yodhi kibëc ëka ebed calö Kiricito, na ënë obedo awi jö n'oye Kiricito.

16 Ënë obedo wic, dul kom kibëc riberë gin i kome ëka kubere gin kanya acël i wang romo kibëc na tye ië. Cë ka dul acëlacël tye ka tio tic mërë kakarë, miö kom döngö na bër ki mar.

Kwö na nyen i Kiricito

17 An akobo niwu ki twër na Rwoth ömia ni kür myero döki imëdërë unu më bedo ki koth kwö na jö na ba ngeo Obanga bedo ködë, i thamagi na köny mërë ope.

18 Thamagi önyöbërë dong ökö, ba döki twërö nïang gin. Gin opokere ökö ki kom kwö n'Obanga miö pi kwia piny n'obino nig pi cwinygi n'ödökö na nwang.

19 Gin ba döki parö gin mörö, gin ömirë kën-gi i tim më tarwang ëka thon owor gin rwök më timö koth tim mökö na ba bër.

20 Ëntö man ba obedo kite n'onwongo epwonyowu ködë ki köp i kom Kiricito.

21 Adyer iwinyo unu köp i kome ëka na calö ëlëbkörë epwonyowu ki köp adyer na tye i Yecu.

22 Koth kwöwu na cön na yam ikwö unu ködë, myero iwëk unu dong ökö. Koth kwö nön öbal dong ökö pi miti na reco n'öbwölöwu.

23 Wëk unu Obanga dong ölok thamawu më cwiny obed na nyen,

24 ëka iruk unu kom na nyen, n'ecweo më bedo calö Obanga i adyer më kite atir ëka na leng.

²⁵ Pî manön ngat acêlacêl myero öwêk köp më twodo êka ötwak köp atîr both awodhe, piën onu kibêc ebedo jö më dul kom acêl.

²⁶ “Ka akêmö ömaköwu, kür ipodh unu i bal.” Kür imîi unu ceng ödöny nakun akêmö pod ömaköwu,

²⁷ êka kür imîi unu karê both Catan.

²⁸ Ngat n'obedo ka kwalö jami ka jîi myero öwêk kwo ökö êka öcak tio tic më timö gin mörö na bër kî cingê, êk onwong gin mörö më kõnyö kî jö nökênê na mitö kõny.

²⁹ Kür imîi unu köp na rac odonyi kî i dhöwu, êntö twak unu köp na bécö kékên na kõnyö më döngö jö nökênê na lübêrê kî gin na mîtêrê, êk jö na winyo köpwu onwong kõny kî iê.

³⁰ Kür imîi unu Tipo Naleng k'Obanga okum, n'emïöwu êk obed calö anên mërê n'emwönö i komwu pi kürö ninö më kököwu.

³¹ Wêk unu dong bedo kî kêc cwiny, wang ic, akêmö, dha i wi jö nökênê, ayeny, êka rac cwiny kibêc.

³² Nakaka manön, bed unu jö na timö kîca both ngat acêlacêl kî cwiny na bër, tim unu kîca i kinwu kenwu kite n'Obanga ötimö niwu kîca i Kiricito.

5

¹ Lüb unu kite k'Obanga, piën onu ebedo êthînö na ên marö.

² Bed unu nakun ilübö unu yoo më mar, na calö Kiricito ömarö onu, cê ömîrê kênê pi onu na calö tyêr n'ëwangö na ngwece kur both Obanga.

³ Dong pi manön tim më ölyang, onyo tim mökö më carö carö, onyo woro më lim myero kür ekob

ï kinwu, piën man ënë tîm na ba opore pî jö k'Obanga na leng.

⁴ Ba bër niwu më twakö köp mökö më lewic, twak mökö më mingo onyo twakö köp më arath, kür myero thon owinyere bothwu, ëntö thwara ïmïï unu pwöc both Obanga.

⁵ Un ïniang na bër nï ngat mörö ope ï kin jö n'obedo jö ölyang, jö na tîmö tîm më carö carö, onyo jö n'owor ï kom jami—koth dhanö ni obedo awör cal jwogi—na ba bino nwongo dul mörö më bedo mëgë ï ker ka Meciya ëka më k'Obanga.

⁶ Kür iye unu ngat mörö öbwölwu kî köp mökö na thërë ope, piën akëmö k'Obanga bino ï kom jö na ba winyo köp mërë pî tîmgî nonu.

⁷ Pî manön kür ïribërë unu ködgî.

⁸ Un onwongo cön itye unu ï pîny na cöl, ëntö kobedini un dong itye unu ï pîny na tar ï Rwoth. Bed unu calö ëthînö më tar

⁹ (piën nyig n'önyak pî tar nen ökö ï gin na kibëc na tye na bër, na kite atîr ëka adyer)

¹⁰ ëka itëm unu më pwonyo ngö na yomo cwiny Rwoth.

¹¹ Kür ïribërë unu ï tic mörö kibëc më pîny na cöl na ba könyö, ëntö thwara ituc unu tic nonu ökö kanyalër.

¹² Piën obedo më lewic thon më twak ï kom jami na jö na ba winyo köp tîmö gîni ï müng.

¹³ Gin mörö na tar onyutho nen ökö kanya leng,

¹⁴ piën tar ënë miö jami kibëc nen. Man ënë ömiö ekobo nï:

“Coo ökö, in ngat ïninö,
cer ökö kî ï kin jö n'öthöö,
cë Kiricito bino mënyöni.”

¹⁵ Gwökärë unu, i kite na un i kwö ködë—kür ibed unu calö jö na kwia piny, ëntö bed unu calö jö na ryëk.

¹⁶ Tii unu ki caa n'onen na bër, piën man ënë karë më tîm na rac.

¹⁷ Pî manön kür ibed unu jö na mïng, ëntö tēm unu më nïang i kom gin na Rwoth mütö nî un itîm.

¹⁸ Kür imër unu ki kõngö ölökö na kelo tîm më carö. Nakaka manön, wëk unu Tipo Naleng opong i cwinywu,

¹⁹ nakun itwak unu i kinwu kékënwu ki köp më jabuli, wer ëka ki wer më cwiny. Wer unu wer më pakö Rwoth i cwinywu.

²⁰ Mii unu pwöc both Obanga Apap i karë kibëc pî jami kibëc i nyïng Rwoth onu Yecu Kiricito.

²¹ Mirë unu kékënwu i thë löc ka jö nököenë, ngat man both awodhe, pî wörö Kiricito.

Mon ëka cwö

²² Un mon, mirë unu kenwu i thë löc ka cwöwu, na calö imirë unu kenwu both Rwoth.

²³ Piën ëcwö ënë obedo awi dhakö kite na Kiricito obedo awi jö n'oye ën, na gin ënë kome, ëka Kiricito obedo alar ka jö n'oye ën.

²⁴ Kite na jö n'oye Kiricito mirë ginî i thë löc ka Kiricito, mon thon myero ömirë ginî i thë löc ka cwögi i jami kibëc.

²⁵ Un cwö, mar unu monwu kite na Kiricito ömarö ki jö n'oye ën ëka ömïö kwö mërë pîrgi,

²⁶ ëk ëlönygi obed na leng, kinge na dong ölwökögi ki pii ëka ki köp,

²⁷ ëk ekel jö n'oye ën i nyime na calö nyakö n'ëyübö më anyöma, na poo mörö ope i kome onyo

na terinyime öjüjunga onyo gin mörö nökënë na rac, ëntö obed na leng na bal mörö ope i kome.

²⁸ İ yoo acël nön, cwö myero ömar mon-gĩ kite na gĩn marö kĩ komgĩ kën-gĩ. Ngat na marö dhakö mërë nwongo marö kome kënë.

²⁹ Ngat mörö ope na dag kome kënë, ëntö pïdhö kĩ cem ëka gwökö, kite na Kiricito thon gwökö ëka pïdhö kĩ jö n'oye ën,

³⁰ pïen onu ebedo dul kom Kiricito.

³¹ Kite n'ëcöo ködë i Cöc na Leng ni: “Pĩ tyën köp ni ëcwö bino wëkö apap mërë ëka aya mërë, cë rïbërë kĩ dhakö mërë, ëka jö ariö bino dökö kom acël.”

³² Man obedo müng na dit—ëntö an atye ka twak i kom Kiricito ëka kĩ jö n'oye ën.

³³ Pĩ manön, ëcwö acëlacël i kinwu myero thon ömar dhakö mërë kite na ën marö kĩ kome kënë ëka dhakö myero öwör cwörë.

6

Enyodo ëka ëthïnögĩ

¹ Un ëthïnö, winy unu enyodowu i Rwoth, pïen manön ënë bër.

² Cöc na Leng kobo ni, “Wör apapni ëka ayani,” man ënë cik më acël n'ëcïkö pĩ gĩn mörö na bër na bino yaa kĩ ië—

³ “ëk ibed unu na bër ëka ibed unu i lobo pĩ karë na lac.”

⁴ Un jö kabebe, kür iter unu ëthïnowu i yoo na rac na mïö akëmö makögĩ, ëntö mïi unugĩ ödöng na bër nakun ipwonyo unugĩ ëka inyutho unu nïgĩ kite na bécö na Rwoth pwöyö.

Opîi ëka editegi

⁵ Un opîi, winy unu editewu më lobo kî cwiny acël, na calö iwinyo unu Kiricito, nakun ilworo unugi kî myël kom.

⁶ Ticwu myero kür obed tic n'ënënö kî wang kékên më yomo cwiny dhanö, ëntö tii unu gin n'Obanga mitö kî cwinywu kibëc, na calö opîi ka Kiricito.

⁷ Tii unu ticwu kî cwiny na bër, na calö itio unu pî Rwoth, ëka pathî pî dhanö,

⁸ piën un ingeo nî Rwoth bino cülö ngat mörö kékên, kadî obedo opîi onyo ngat mörö na löörë kënë pî gin mörö kékên na bër na ën otio.

⁹ Wegî opîi, ter unu opîiwu î yoo acël nön. Kür ibür unugi, kite na un ingeo nî adit na löögî ëka kî un tye î polo, na ën makö jö kibëc na röm aröma.

Kwot k'Obanga

¹⁰ Më ajiki, bed unu na tæk î Rwoth ëka î twërö më tækö mërë.

¹¹ Ruk unu jami më lwëny n'Obanga mïö, ëk icung unu na tæk, nakun igëngërë unu kî kom ököra ka Catan.

¹² Piën onu ba ëlwënyö kî dhanö adhana, ëntö ëlwënyö k'ëlöc ëka wegî twër më yökö, na löö wi lobo thükül î karë nî më cöl pîny ëka kî tipo mökö na reco na tye malö î wi yamö.

¹³ Pî manön, myero iruk unu jami lwëny n'örömö n'Obanga mïö, ëk ökönywu më cung na tæk ka nînö na rac othuno, ëka kinge lwëny naka î ajiki, un pod ibino cung unu na tæk.

¹⁴ Pî manön myero icung unu nakun itweo unu wang pyërwu kî del më köp atîr, ruk unu kite atîr obed nywenyo më gwökö korwu,

¹⁵ ëka iyübërë unu më titö köp më Emuth na Bër më kuc na calö wör më tyënwu.

¹⁶ Mëd i kom jami ni kibëc, yeewu myero obed kwotwu na un itwërö neko mac ki i kom athërö na Catan yuo.

¹⁷ Ruk unu larë obed tok nywenyo më wiwu, ëka köp k'Obanga na ënë pala abadë ka Tipo Naleng.

¹⁸ Lëg unu lëga kibëc na papath ki tükö ka Tipo Naleng i karë kibëc. Bed ni yübërë unu i karë kibëc nakun idangö unu pëkö, ëka ilëgö unu pi jö k'Obanga kibëc.

¹⁹ Lëg unu thon pira ëk Obanga öyab dhöga, ömia ngö na myero atwakï, ëk atuc müng më köp më Emuth na Bër.

²⁰ An abedo akwëna mërë na röm ki ngat mörö na cung pi lobo mërë, ëntö etwea ökö ki nyör. Lëg unu ëk atwak abonge lworö i kom Emuth na Bër kite na an myero atwak ködë.

Moth më ajiki

²¹ Ömin onu Tukiko na an amarö ëka atic na genere i Rwoth, bino kobo niwu köp kibëc i koma ëka i kom ticna, ëk un thon inge.

²² An atye ka oro ën yo bothwu pi tyën köp ni, ëk ën ömiiwu inge kite na wan etye ködë ëka ödii cwinywu.

²³ An alëgö ni Obanga Apap ëka Rwoth Yecu Kiricito bino mïö kuc, mar ëka yee both utnego kibëc.

²⁴ Kica k'Obanga obed both jö kibëc na marö Rwoth onu Yecu Kiricito ki mar na ba thum.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80